

Riječ Redakcije

Drugi broj Radova (Historija, Historija umjetnosti, Arheologija) posvećen je nedavno preminulom prof. dr. Iljasu Hadžibegoviću (1938-2010). Ovaj broj sadrži nekoliko rubrika u kojima se putem različitih doprinosa većeg broja autora prepoznaje aktivnost Odsjeka za historiju i katedri Historija umjetnosti i Arheologija u prethodnom periodu. Oslonjen na izdanje prvog broja i u namjeri da svaki naredni broj posvećujemo istaknutim predstavnicima naše struke i Filozofskog fakulteta u Sarajevu, ovaj broj časopisa posvetili smo našem dragom profesoru Iljasu Hadžibegoviću. Zato ga otvaramo priložima sa *Okruglog stola Iljas Hadžibegović – čovjek, naučnik, pedagog* održanog 27. aprila 2011. godine na Filozofskom fakultetu u Sarajevu. U svećenom ambijentu, uz prisustvu rodbine, prijatelja i predstavnika Fakulteta prodekana prof. dr. Saliha Foče kao pokrovitelja, učenici i kolege valorizirali su profesorov dugogodišnji nastavni i naučni doprinos ističući njegove ljudske i organizatorske sposobnosti te značajne radne rezultate koji su mu osigurali izuzetno mjesto u modernoj bosanskohercegovačkoj historiografiji. Za uspješnu organizaciju okruglog stola i pripremu izlaganja za štampu zaslužni su doc. dr. Edin Radušić i asistent Amir Duranović.

U drugom dijelu objavljeni su rezultati *Okruglog stola Nastava historije u školama u Bosni i Hercegovini* održanog u Sarajevu 12. maja 2011. godine. U prisustvu nastavnika, predstavnika vlasti i brojne publike, među kojima ponajviše nastavnika historije, razmatrana je teška situacija u obrazovnom sistemu izazvana neopravdanim promjenama u tretiranju nastave historije u školama. Putem ovog okruglog stola, potpomognutog inicijativama Odbora za historijske nauke Akademije nauka i umjetnosti Bosne i Hercegovine i pokroviteljstvom prodekana za nastavu Filozofskog fakulteta u Sarajevu prof. dr. Dubravka Lovrenovića, Odsjek za historiju podržao je predstavnike naše struke i omogućio da se čuje njihova kritička prosudba aktualnog stanja. Izvedene zaključke kao prijedloge za statusno poboljšanje položaja nastavnika Odsjek za historiju je prosljedio nadležnim predstavnicima u ministarstvima zahtijevajući otvaranje dijaloga o tretmanu nastave historije u osnovnim i srednjim školama u Bosni i Hercegovini. Na realiziranju ovog okruglog stola i pripremi njegovih rezultata značajan doprinos dali su prof. dr. Zijad Šehić i viši asistent mr. Emir O. Filipović.

Ostatak časopisa predstavljaju uobičajene rubrike sa člancima, raspravama, prikazima, recenzijama, osvrtima i izvještajima u kojima su pored nastavnika i saradnika svojim priložima učešće uzeli i studenti Odsjeka za historiju i katedri Historija umjetnosti i Arheologija. Posebnim prilogom izdvaja se *Promocija zbornika radova sa međunarodne konferencije 'Bosna i Hercegovina u okviru Austro-Ugarske 1878-1918'* koju

je pod pokroviteljstvom dekana Filozofskog fakulteta u Sarajevu prof. dr. Ive Komšića znalački moderirala viši asistent mr. Amila Kasumović. Prilog prezentira kapitalnu, uspješno zaokruženu i završenu plodnu naučnu aktivnost Odsjeka za historiju i Filozofskog fakulteta u Sarajevu na organizaciji konferencije, objavljivanju rezultata u formi zbornika i njegovim predstavljanjem naučnoj i stručnoj javnosti. Na kraju su data prigodna slova nedavno preminulim istraživačima bosanskohercegovačke prošlosti, pregled diplomiranih studenata Prvog i Drugog ciklusa po bolonjskom sistemu školovanja na Odsjeku za historiju i katedrama Historija umjetnosti i Arheologija te slikovni prilozi o proteklom aktivnostima.

Finansiranje ovog broja pomoglo je Ministarstvo obrazovanja i nauke Federacije Bosne i Hercegovine te Filozofski fakultet u Sarajevu, na čemu se u ime autora, Redakcije i čitalaca iskreno zahvaljujemo. Nadamo se da će rezultati opravdati uložena sredstva i trud autora i Redakcije da se prezentira bogata aktivnost Odsjeka za historiju, katedri Historije umjetnosti i Arheologije, te Filozofskog fakulteta u cjelini.

Esad Kurtović
Urednik